


黃文獻集  
補附  
遺錄

五





黃文獻集

附錄補遺

(五)

黃潛撰

# 黃文獻公集卷之八上

## 墓記

### 八世祖墓重建石表記

宋黃府君諱景珪字叔寶婺之浦江人。潛八世祖也。府君父諱昉字明仲母于氏墓在縣西花橋之南。而府君墓在縣北之後店。夫人朱氏子一人諱琳娶宗忠簡公澤之女弟始家於義烏是爲潛之七世祖。孫三人伯曰璣仲曰益其季諱中輔則潛之六世祖也。自是族日以大舊譜所載間有脫略其可見者曾孫萬頃昭祖紹祖公顯公煥無咎少亮潛之揚祖九人諱紹祖者於潛爲五世祖元孫伯謹簡天壽慕韓某伯昌必大伯信夢符伯恭三畏伯紀桂發繼介子唐英綱縝十八人諱伯信者於潛爲四世祖累贈朝散郎朝散公有子三人長諱夢炎朝散大夫行太常丞兼樞密院編修官兼權左曹郎官以朝請大夫致仕次忠翊郎權安慶府望江縣令焱次太學生熒朝請公未第時嘗刻石表府君墓年世殊邈或竊取其石而去或據其墓垣外餘地而有之太學生之孫可久望江令之孫可傳等始按其籍悉復故地遂伐石重建此表俾潛志於下方潛朝請公之曾孫承節郎諱堦之孫皇贈中順大夫同僉太常禮儀院事江夏郡伯諱鑄之子某生也後無從備聞上世事府君之年壽卒葬與凡行事雖逸其傳而子孫衆多有以彰積

善之餘慶。是爲叙次世系。訖於功總。譜所弗具。莫能詳也。祖免而下。今又六世。譜之所及百五十人。亦不得而盡著焉。至正七年春二月甲子。八世孫潛謹記。

先祖墓銘石表記

嗚呼。是爲吾祖考黃公祖妣徐夫人之墓。自我先人奉柩合葬。於茲十年。而潛誤玷科名。叨塵官使。又二十有八年。乃得請而致其事。德薄位卑。所以榮其先者。寵數有限。後四年。欽承上旨。起自退休。入直翰林。備員侍講。始用著令。得推恩二代。比年兩膺錫命。公初贈中順大夫禮部侍郎上騎都尉。追封江夏郡伯。再贈嘉議大夫禮部尙書上輕車都尉。追封江夏郡侯。夫人亦自江夏郡君。進封江夏郡夫人。惟黃氏婺大姓。由金華散處他郡者。仕宋多致顯官。而公七世祖諱昉。六世祖諱景珪。仍居婺之浦江。五世祖諱琳。娶忠簡公女弟。又徙義烏而爲其縣人。未有出而仕者。高祖諱中輔。以文學行義知名。轉運使薦於朝。將授以官。命垂下而卒。曾祖諱紹祖。復隱弗仕。祖諱伯信。迪功郎累贈朝散郎。妣宗氏。忠簡四世諸孫女。累封安人。考諱夢炎。淳祐十年進士。仕至朝散大夫。行太常丞兼樞密院編修官兼權左曹郎官。以朝請大夫致仕。妣陳氏方氏。陳氏贈宜人。有子曰垓。方氏實生公諱堦。朝請公第二子也。朝請公遇明禋當任子。輒推以與其姪。故公兄弟無用廕入官者。公僅以進納補承節郎。而不及祿。生於嘉熙四年六月二十四日。卒於今大德八年五月二十四日。享年六十有五。夫人東陽徐氏。曾祖諱楠。祖諱忻。考諱彬。淳祐七年進士。嘗以奉議郎行國子正。與朝請公並入淮西淮東制幕。爲主管機宜文字。會改建兩淮宣闡。又同辟

幹辦公事。故以夫人來歸。而公以疾廢。夫人安於命。分育我先人爲子。以保其世業。三從之義。靡所缺虧。生於淳祐四年八月一日。卒於今大德七年八月二十四日。享年六十。墓在縣東北崇德鄉東塋之原。與先塋相望。葬以十年八月。贈封之制下。則至正七年十月。八年十二月也。一子。卽我先人諱鑄。用朝請公遺澤補將仕郎。宋亡。遂絕意仕進。後五十年。乃以恩受封。終於從仕郎溫州路樂清縣尹。今累贈中奉大夫江浙等處行中書省參知政事護軍。追封江夏郡公。孫男五。長卽潛。次溥。次浩。爲朝請公長女之子。劉應龜後。更名鼎。次滋。爲朝請公長男垓之子。頤後。女三。適賈師夔。劉咸生。劉拱辰。曾孫男六。樞。樛。梓。樞。杞。楨。女二。適陳克讓。劉道泰。元孫男八。璿。瓊。璋。瑞。瑄。琛。瑋。女三。嗚呼。昔歐陽文忠公作瀧岡阡表於卜吉六十年之後。自以爲非敢緩也。蓋有待也。潛衰謝之餘。繼罹憂患。苟存視息。以終天年。甯復有所待乎。詔使在門。義不俟駕。龍光赫奕。有隕自天。褒大顯榮。賁及泉壤。則文忠所謂遲速有時。不克有於躬。而足以表見於後世。庇賴其子孫者也。虔奉命書。展告元宅。感慕涕泣。不知所云。姑序其梗概于茲石表。嗚呼來者。尙有以知其所自。而永永不忘哉。至正十年八月一日。孫男潛謹記。

先考墓誌銘後記二首

先君既葬且免喪。潛起自草土。復從薦紳之後。因得乞誌銘書篆。於同年三鉅工。顧以糜身下列。久未克歸入石。旣蒙恩外補。以先夫人春秋高。不俟引年。納祿而歸。將礪石以刻。而奄罹大故。惟先君薦膺崇贈。祠版已屢改題。誌銘書篆。不宜尙仍其舊。先夫人之葬。僅序歲月納諸壙。而未有以昭示於後人。潛憂患

餘生退休田里。無繇奔走俯伏大人君子之門以請。懼因循廢缺。愈重不孝之罪。謹以其文。摹勒上石。而以其所未及書者。悉系于石陰。童氏金華大姓。先夫人之曾大父恮。迪功郎臨安府錢唐縣尉。大父必遇。迪功郎紹興府嵊縣主簿。父承信公。娶俞氏。以寶祐四年六月十九日生先夫人。年二十歸于先君。後先君十二年卒。至正三年六月二十三日也。享年八十有八。其年八月二十七日。奉柩祔于先君之右。先君受封五年卒。官七品。潛自國子博士出。爲江浙等處儒學提舉。始贈先君奉政大夫祕書監丞驍騎尉。追封義烏縣子。先夫人進封義烏縣太君。潛之婦王氏。昭慶書記公會孫女。亦自宜人加封義烏縣君。潛既得謝。而廷議妙柬元臣。付以史事。旁招疏牋。俾預討論。使者及門。先夫人之殯在堂。已九日矣。服除。乃拜祕書少監致仕之命。累贈先君中順大夫同僉太常禮儀院事上騎都尉。追封江夏郡伯。先夫人追封江夏郡君。孫男櫛已卒。梓國子學生。今用廕赴吏部銓。女嫁惠州學正陳克讓者。亦已卒。次嫁劉道泰。曾孫男又三。璋。瑞。瑄。女一。此誌之未及書者也。然所謂考其所自出者。蓋有不容盡泯。所謂贈典日隆者。固逆知其可必。潛是用推述而備著之。先君之嘉言懿行。先夫人之淑德令儀。雖非不肖孤所能稱道。祖父姻亞官封卒葬之詳。來者或有稽焉。至正五年十二月十五日。男潛謹記。

潛立石未幾。而被上旨落致仕。入直翰林。備員侍講。比歲累蒙推恩。褒及於二代。承節府君初贈中順大夫禮部尙書上輕車都尉。追封江夏郡侯。徐夫人初追封江夏郡君。再追封江夏郡夫人。先君加贈集賢直學士。亞中大夫輕車都尉。追封江夏郡侯。再加中奉大夫江浙等處行中書省參知政事護軍。追封江



夏郡公先夫人兩追封。皆江夏郡夫人。潛之婦王氏。亦兩封江夏郡夫人。間者潛以衰朽。乞身而退。克親奉帝制。展告以禮。俄復拜召還之命。未遑有所登載。茲幸得請。歸守先隴。乃序次其略。附見于石陰之下。方曾孫男又三。琛。瑋。女二元。孫男一道永。至正十年七月七日。男潛謹記。

### 外舅王公墓記

外舅王公之歿。遺命屬潛誌于幽堂。潛方竊食輦下。旣蒙恩外補。乞身而退。俄被旨落致仕。復玷朝行。及得謝而歸。則奉襄大事已久。潛亦老而耄及之矣。念他日不可無以藉手見公於地下。謹追書其所可知者。俾揭於墓之原。公諱桂。字仲芳。姓王氏。月谿其自號也。其先汴人。宋渡江初。五世祖琳。避地南來。家於婺之東陽。暨四世祖徽。咸弗仕。曾祖諱師伋。以子貴。累贈中奉大夫。妣宗氏。京城留守兼開封尹贈觀文殿學士忠簡公澤四世諸孫女。通判衢州夔之曾孫女。累贈令人。寶章閣學士劉公克莊銘其墓。祖諱困金。嘉熙戊戌甲科進士。授從事郎。昭慶軍節度掌書記。未上而暴卒。妣黃氏。我高祖贈朝散郎諱伯信之女。曾祖太常丞樞密院編修官左曹郎官朝請大夫致仕諱夢炎之姊。朝散與中奉爲友婿。故以長女爲其冢婦。考諱沂。文林郎監沿江制置副使司造場。妣張氏。初。昭慶入奉大對。臚唱之日。太師魯國喬文惠公行簡爲首相。立殿上。退遣吏賀曰。當以衣鉢相傳。蓋謂其居同里。同以四十餘爲殿試第五人也。而不料其竟不及祿。母弟曰鎔。前十年已擢龍飛第。踐敷所至。內則郎曹寺監。外則監司帥守。終於中奉大夫直煥章閣荆湖南路計度轉運副使。撫兄子如己子。由是文林以恩補官。公本宗氏子。令人之從孫也。煥

章遵母命。俾爲文林後。亦以恩補將仕郎。公生長宦家。自少親炙諸老。痛洗綺紈子弟侈靡之習。而刻意於學。爲文操筆立就。若不經思。而藹然有前輩典型。尤工於歌詩。樂府駢四儷六之語。善楷書。端勁方嚴。得顏柳遺法。南嶽有鎮南之殿四大字。乃煥章將漕時。令公代作。迄今猶存。人莫知爲公之筆也。隨侍宦游。歷七閩三湘。且久留江上。多所見聞。遭時艱虞。頗慨然欲以事功自奮。際今聖代。四海合一。分命重臣。坐鎮南服。號曰行省。承制署公處州麗水縣主簿。公不敢辭。受而不赴。自是絕意於仕進。徙居別室。開門授徒。生計日衰。簞瓢自適。安常處順。旣壽而康。重紀至元之五年某月某日。不疾而卒。享年八十有八。有四書訓詁十卷。詩文雜藁十卷。隨筆一卷。娶李氏。寶謨閣直學士吏部尙書大同從曾孫女。前公十有七年卒。子男二人。長武。次復。並爲外家李氏壻。武後公某卒。復今獨承其家。女五人。長卽潛妻。累封江夏郡夫人。潛之曾祖姑。歸於昭慶。王氏以女歸於潛。篤世姻也。次適李法。尙書四世嫡孫。次適何德光。次適呂潮。某州司法參軍友德四世孫。次適何德潤。孫男二人。坦。坦亦已卒。女一人。凡子孫若壻若外孫男女合三十有二人。先是煥章葬縣北甘泉鄉廣陵寺之後山。構祠宇。割田四十畝。有奇。俾寺守之。而僧悉以田質錢於富民。公銖積寸累。贖而還之。晨香夕燈之須。賴以無闕。公又以昭慶墓在縣南之東姜族子或竊其地券售於豪家。有司弗能直。文林墓在縣南之桐川。又數毀於盜。遂卜地於煥章墓東南之唐塢。遷兩世四喪及內子之柩。以昭穆序葬。仍虛其左以爲壽藏。旁置冢舍。名曰繼庵。示子孫使勿替其承也。公旣歿。二子以至正某年某月某日奉柩。卽公所自爲罇槨安厝焉。始公命潛銘外姑之葬。而自銘其壽藏。



曰。生吾順兮。歿吾寧。魂氣超騰兮。風露青冥。佳山佳水兮。佳城鬱鬱。吁嗟兮。吾其寓形此室。銘成而不及。自誌其平生本末。爰以屬於潛。惟公之盛年。有官而無位。晚復抗志事外。故其素蘊不少。概見於設施。潛所書若甚簡略。而皆有可徵。不敢效世俗巧飾誣言以爲欺也。至於系序官伐姻亞之詳。雖細勿遺。不暇一一裁以古書法而去其繁冗。誠懼夫後之人日遠日忘也。過而覽者。幸無誚焉。至正十三年冬十有二月二十七日庚申。壻翰林侍講學士中奉大夫知制誥同修國史同知經筵事黃潛謹記。

## 銘

### 勤有堂銘

皇錫下人。展也良貴。能者守之。罔敢怠棄。惟勤爲常。非有爲異。及身而誠。萬物皆備。其勤斯何。妖壽以之。雖休無休。伊誠之思。其有斯何。匪我也私。不物於物。而誠之爲。孰勗而躬。閔勉朝夕。封吝殖驕。孰爲已得。一元默運。其生職職。天德之修。人道之極。猗君之爲。厥志允臧。式敬爾承。勿助勿忘。閑邪存誠。充實輝光。我曷振之。勒銘茲堂。

兼善齋銘

墨貴兼愛。儒者摯之。詎曰此道。我之得私。必由其本。以及其支。相古先民。孰爲我師。莫窮匪顏。莫達匪伊。何志何學。朝斯夕斯。乾之善世。則罔敢知。坤之積善。尙其孳孳。止也以所動也。以時毋慕千里。忽于毫釐。仁如夷吾。或羞其卑。爲善有術。視我銘詩。

腴晦齋銘

王君仲致。以腴晦名其齋。蓋有取乎考亭朱子冠而字之祝辭云爾。夫所謂人晦於身。神明內腴者。復而通也。今乃援其辭而左之者。通而復也。仲致來徵銘。爲之銘曰。

惟皇播物。終始一誠。屈信相推。乃色乃形。有出於幽。以豐而亨。有入斯息。明夷之貞。而通而復。與時偕行。展也王君。斂其華英。退藏于密。以觀其生。與造物者。游神之廷。曰予庶幾。天之性情。我曷相之。式彰茲銘。

息菴銘

上人允茲。扁其菴曰息。因以自號。蓋扁以章所息之處。號以表能息之人。能所相爲無窮。吾未見其息也。上人來徵銘。爲之銘曰。

謂菴非人。孰累於名。謂人非菴。名孰與嬰。所息者境。能息者智。菴邪人邪。依正不二。刹那之頃。能所雙亡。十劫何短。一息何長。勿生癆勞。而止中路。咄茲草菴。非汝住處。

圓硯銘

翼之家藏王使君所貽圓硯。有白文貫其腹。銘曰。黑之守處也久。白之不涅歸也潔。

### 興讓堂銘

何君貞立。起進士官七品。法當封父母及妻。父以讓於其祖。妻以讓於其祖母。有司如其請以聞。地恩既行。乃扁所居之堂曰興讓。名人鉅公樂道其事。紀載而誦詠焉。君出以示予。因系之以銘曰。讓之爲義。推己所有。木水本源。則有所受。子承其考。婦繼其姑。家之積慶。匪我有餘。嗟嗟末俗。借鉏取帚。孰視爾民。俾歸於厚。施由親始。千乘可輕。義以起禮。善不近名。皇仁在上。孝子不匱。奕其龍光。恩榮備至。爰建稱號。樹之風聲。一家之讓。國人其興。作爲銘詩。薦此樂石。匪私其家。維以勸德。

### 方齋銘

鄱陽胡君。以方齋扁讀書之室。而俾其子益來徵銘。爲之銘曰。輿之方。輪以圓而相資。鑿之方。柄以圓而相達。天下之方。盡于五寸之矩。所不能盡者。物情之不齊。是故君子方以正己之度。圓以任物之宜。主至靜以爲德。不自毀于腓隨。匪惡圓而喜方。諒所秉之莫移。爾息爾藏。矩範在茲。無矜而名。尙允蹈之。

### 青石硯銘

雪竇方丈所蓄青石硯。德壽故物也。銘曰。

匪琥其白。匪璋其赤。夫蒼蒼者。天之正色。韞匱而藏。守之以黑。毋曰茲宋之隕石也。

恆德齋銘

易之爲義。隨時變通。有不變者。確乎其中。是曰恆性。人之固有。充爲恆德。不息則久。聖人之道。久而化成。由其不息。是之謂恆。惟君法天。偕行偕極。惟臣承君。咸有一德。繫公之先國之元臣。篤生後賢。左右聖君。吾儕小人。朝不及夕。夫孰如公。自強不息。體之既立。其用必行。措諸事業。乃恆之亨。允懷于茲。益謹其度。與國同休。以永終譽。

墓誌銘

張君妻趙氏墓誌銘

潛爲諸暨州判官之明年。得一士曰張復。蓋喪其母。踰再閏。猶哀慕不已。益求時之聞人。爲詩若文。以抒無窮之悲焉。竊嘗取而閱之。非直其母爲可稱道。其父之事。尤有足紀者。夫刑善以勸俗。長民者之責也。潛幸以末學。與聞有政。庸掇其繫乎人之大倫者。爲銘以畀之。銘曰。

於粵之墟。句無之里。孰望其地。曰有張氏軫君之名。君實其字。羣居太學。五載不第。文不在茲。運去物改。白刃可蹈。惟義所在。爰有賢配。克儷其美。名曰與婉。胄出燕邸。五世祖諶。疏封安定。從伯祖光。典領宗正。暨惟伯父。以文藝著。兩制八座。累膺異數。父曰希堅。進食京秩。出宰桂平。千室之邑。其叔父壘。亦主外藏。流芳奕葉。後先相望。展也令淑。婦德是履。守節自誓。嫠居四紀。至治初年。龍集壬戌。三月之朏。翼日而卒。上距始生。五百甲子。男復暨頤。訖葬以禮。于嗟復也。終身之慕。禫服既除。祥琴弗御。父也義士。母也節婦。不有孝子。曷顯父母。繫長民者。宜存風勵。顧慚不敏。承乏下吏。瞻彼西莊。九九松柏。勤辭相哀。用勸凡百。

### 江浙行中書省左右司都事劉君墓誌銘

君姓劉氏。諱濟。字仲源。河間肅寧人。大父法靜。父元。皆弗仕。至君始以東江場同管勾。遷昌國正監管勾。入御史臺。爲宣使肅政廉訪司。立選授江南浙西道管勾。承發架閣兼照磨。以照磨勅其使貪縱不法。事聞。使坐斥去。君亦以秩滿。調婺州路司獄。有余甲者。以貧自鬻爲人奴。勢家子慕甲妻美。弗能得。會其主病死金華道上。因誣甲殺主而奪其妻。吏旣傳致成獄。君直其冤。破械出之。蘭谿民王乙。爲怨家所殺。乙親戚兩人將訴其事。怨家懼。更屬吏捕治兩人。謂乙私其妻。實共殺乙。賴君言徙其獄旁郡。兩人得不死。他以事株連。若鍛鍊無得而久繫者。君悉爲剖析。所活十有四人。所縱遣八十餘人。永康大姓。以睚眦之怨。毆人至死。有司弗敢詰。反抵告者罪。君求得其情。乃收案殺人者。宣慰使而下。以受賕曲法敗者。五十餘人。用舉者復入江南諸道行御史臺爲令史。丁父憂。服除。授湖州路總管府經歷。於是天子方用言者。

悉徙江浙行中書省郎中以下他官。更取材望補其處。君以選擢左右司都事。且追用平反。超陞承德郎。到官明日而卒。延祐元年七月二日也。得年五十有五。其孤汝桂等。將奉柩歸肅寧。以某年某月某日葬縣東安仁鄉長城之原。泣謂潛。子辱游於先人最久。宜知先人。盡有述。潛。嫠人也。幸能道君爲獄官時事。他宜傳者。詎止是耶。史稱于公爲郡決曹。決獄平。今所見獨孝婦不殺姑一事。而太守莫能聽。至令抱具獄哭而去。然則君亦足以不朽矣。謹次而爲之銘。君娶曹氏。次林氏。子男三人。汝桂。汝楫。汝弼。女三人。長適同郡韓梓道。餘在室。孫男若干人。女若干人。銘曰。孰降其材。而奪其施。孰受之器。而易其宜。百疇一逢。孰終尼之。維善無小。維官無卑。考事列辭。式昭厥垂。

眞定路深州知州致仕劉公墓誌銘

公姓劉氏。諱守讓。字謙甫。其先由大父立而上。世爲汴人。金末。父信避地眞定。因家焉。故今爲冀州南宮縣人。母李氏。有五男子。公其季也。公年甫踰弱冠。入祕書監爲奏差。尋又入御史臺爲殿中司知班。久之。擢浙東海右道肅政廉訪司管勾。承發架閣庫兼照磨。時方新使名。以正憲度。將指者皆名卿參佐。悉取材望。公妙年首膺其選。深自底勵。以求報稱。間以慮囚攝使事行郡邑。懲姦貪。省冤滯。接引善類。所至有聲。居七年。乃代去。調婺州路總管府知事。俄復入江南諸道行御史臺爲令史。調霍州靈石縣尹。未上。丁內艱。服闋。改慶元路平準行用庫提領。秩滿。以奉訓大夫眞定路深州知州致仕。至順二年十二月十五日。以疾卒於鄞之寓舍。得壽七十有五。公長髯秀眉。容止言論。閑雅不迫。有古君子風。善屬文。尤喜爲歌

詩以其自號扁所居室曰本齋。琴樽圖史羅列左右。退食則宴息其中。客至輿談中原文獻之舊。娓娓不倦。性廉退。不急於進取。每詣京師。輒自赴吏部銓。俛首常調。殊無難色。其任筦庫也。分帥閫乘廉車者。皆公故等夷。見公必與均禮。公執其分守。滋益恭。仕既久而家愈落。歿之日。賴故舊致賻。乃克以斂。其清約如此。娶鄭氏。張氏。皆先卒。子男五人。長元。以公蔭爲晉寧路石樓縣尉。次貞。祐。某某。女三人。長適管軍萬戶孫毅。夫次未行。次適孫某。孫男三人。女一人。初公母氏卒于建鄴。葬城西之清涼山。元等將以某年某月某日奉公柩葬其左。貞來俾某爲之銘。始公佐憲府。某因公行部。以諸生禮見。公未嘗以凡子遇我。自是周旋公父子間殆四十年。銘非潛其誰爲之。雖不文不敢辭也。公家世之詳。約齋劉公實誌之。此不著。銘曰。

人孰不仕。易失者時。嘆老嗟卑。百喙一辭。猗與劉公。蚤有令聞。素乎其位。無喜無慍。澤及後人。惟德之符。我銘孔昭。以勵鄙夫。

福州路總管贈嘉議大夫太府卿上輕車都尉追封天水郡侯諡景惠趙公墓誌銘

公姓趙氏。諱執中。字景賢。世爲趙州晉寧縣人。祖謙。趙州都事。父珣。將仕郎。亳州萬戶府經歷。至元初。太尉河南武定王爲征南都元帥。合蒙古漢軍擊襄陽。公時年未弱冠。以推擇爲吏。隸河南統軍司徒。築白河口鹿門新城。元帥察公材可用。因寘之幕府。公雖主治文書。不專以鉤撫趣辦爲務。日與士卒同冒矢石。未嘗辭難。凡軍中大計。亦往往由公關說。用久。次陞提控案牘。歷行中書樞密兩府。緣太師淮安忠武



王以右丞相行中書省事。復署公爲屬。時襄陽已下。丞相總諸軍水陸並進。公與在行。從諸將轉戰而前。旣渡江。取鄂州。丞相提舟師順流而下。俾公從平章政事楚國武定公分治省事。移書諭降荆湖諸州軍。十三年春。丞相至臨安。以宋版圖來上。計功行賞。公自省提控令史。拜中順大夫壽昌府知府。行同知眞州路總管府事。久之。用例解所佩金符。句容武毅王時在樞密。丞相言公於渡江有勞。且嘗蒙上恩。備官使。宜因其舊職序進之。武毅以聞。得不以有司常法限其資級。改朝列大夫同知泉州路總管府事。用薦者以朝散大夫爲南雄路總管。除中順大夫福建等路都轉運鹽使。秩滿。以少中大夫爲福州路總管。至大二年九月某日。卒於官。享年七十。公之在泉州也。盜起安溪。掠大洋川。據石盤頭。勢張甚。守將莫知所爲。公單騎直抵其處。羣盜大驚。公徐曉以禍福。則相與羅拜。願貸死。公因撫定之。後皆爲良民。蓋公久居兵間。聲望已著。故能使之讐伏如此。其以省檄閱漳州金穀也。得羨錢五千緡。米萬石。其爲轉運也。患富商交場吏受鹽不以法。命以竹器如法實鹽。而倣福之南臺。列倉於漳泉興化以貯之。持引就受鹽者無所容其弊。歲得羨鹽五千九百引。其善理財又如此。惜夫久在外服。其政迹有非談者所能悉知也。夫人王氏。劉氏。皆先公卒。子男七人。長曰鉉。以公廕入仕。今爲承務郎婺州路東陽縣尹。孫男七人。鉉等旣以四年十月某日。奉公暨夫人之柩。合葬寧晉縣村先塋之次。後若干年。始得請於朝。贈公嘉議大夫太府卿上輕車都尉。追封天水郡侯。諡景惠。仍贈夫人天水郡夫人。爰以書來願得銘。昭揭墓道。潛惟人材之生。必於興運。匪特將相重臣。兩有文武。其僚吏亦一時之選也。千載之下。尙論其世。知有伊呂蕭曹而已。

其能因事附見於策書者。幾何人哉。然則趙公之事。固不可無述也。乃弗辭而銘之。銘曰。  
嗚呼趙公。受材孔良。斂藏不耀。出其毫芒。貔貅百萬。長鑕鉤戟。公於其間。持以文墨。豈無悍強。畏此簡書。  
鸚鵡電擊。靡亟靡徐。江流湯湯。其險莫測。投鞭而往。歸數爾獲。孰發而蹤。其功也人。公罔敢知。國有元臣。  
元臣之賢。天子之聖。曰弗汝遺。視汝初命。公材則多。無適不宜。魚符龍節。未究厥施。尙其嗣人。克圖不朽。  
馳書謁辭。式告永久。

亞中大夫漢陽知府致仕盧公墓誌銘

公諱克治。字仲敬。姓盧氏。其先由范陽徙河陰。徙滑之胙城。曾祖諱某。祖諱鉉。皆不仕。考諱璉。嘗佐開州  
軍事。因家焉。故又爲開州人。公少負志氣。稍長。知讀書。慨然思自奮拔於功名。至元十三年。從軍取淮甸。  
有勞。入淮東都元帥府爲令史。厥明年。國家底定南服。論次功賞。授承務郎漢陽府判官。時郡邑新附。人  
心恟恟。凡所以布宣上德。撫慰綏集之者。公之力居多。換從仕郎龍興路總管府經歷。用察官及部使者  
薦。擢江西行中書省左右司都事。以材敏見知於參知政事東平徐公。亡何。以事乘傳入奏京師。  
遷江浙行中書省左右司都事。於是徐公方持部使者節蒞浙右。亟刻上乞署公臺職。未報。而公去爲兩  
浙都轉運鹽副使。東南財計。莫重於鹽筴。先是恆以歲賦減耗爲憂。公規措有法。自常算外。得羨鹽八萬  
九百引。以最聞。除知平江常熟州。下車牒訴坌集。公談笑立決。吏畏服如神。有以強盜坐繫者。公探其獄。  
以爲此愚民無知。因客舟漂抵旁近地而利其菽粟耳。非有首事合謀受分之驗。不可悉寘之死。僚佐疑